

Léopold BAVEREL
CURAT DE
SANTO-ANO, MARSİHO
FREDERI MISTRAL
Glòri de la Fe Catoulico

Eloge prounoucia à Marsiho à la glèiso Sant-Vincèns de Pau emé à la glèiso di Carme, lou bèl an de Diéu 1930

I

PROUMIERO PARTIDO

— *Non nobis, Domine, non nobis sed Nomini tuo et Provinciæ nostræ da gloriam.* —
— Noun à nàutri, Segnour, mai à Vous em' à nosto Prouvènço dounas glòri. —
Paraulo dóu rèi Davi e de Mistral, e que lou Mèstre sus soun toumbèn lis escrinclè.

Mi Fraire, mi Sorre,

Pèr Nosto-Damo de Setembre que vèn, se capito, sabès, lou maje centenàri de la neissènço, à Maiano, de Frederi Mistral.

Despacienta — e fasen coume éu — lou mounde adeja festejo, lou rèi di Pouèto; li nacioun latino, soun Parangoun; la Franço uno de si glòri raiounanto... Mai la Prouvènço, que bat lou rampèu dins de fèsto esptaclouso, emé de counferènci qu'embaumon l'acadèmi — la Prouvènço enauro lou proumié de la raço, e que dins éu, elo, triounflanto n'èro encarnado. D'aquéli triounfle, nàutri, Francés et Prouvençau, fièr n'en sian.

E fièr, tambèn, estènt catouli: dóumaci — e qu'eiçò n'en sara la toco de moun discours. —

— Frederi Mistral, subre-felibre a bèn canta sa Fe.

Bèu crestian a viscu sa Fe: ounour tant grand pèr li crestian si fraire. Sènso saludamen flatiéu acoumençan qu'aven obro grandasso.